

四庫全書

集部

欽定四庫全書

明文海卷一百五十二

餘姚黃宗羲編

書六

論文

復李生書

趙貞吉

足下兩書暨文二篇問予曰可以名世否嘻此特舉業
體式之稍變耳然筆鋒亦未甚振也以此逐取青紫則
易矣欲駕於作者之門則未也夫世之取青紫者何限

得此又奚足泰哉由生之言充其意豈止於薄青紫而不取將不作希文已上人物直欲追古之聖哲而求得其所為道其志大矣乃徐察其量則似以虛為實得少為足而已安於卑近矣此又何說也夫步象蹠者不由兔徑恢大業者必宏遠圖昔古公欲大周之業必遷於岐山之下居焉陶朱欲富其積必處於定陶天下舟車財貨輻輳之處然則士之欲追古聖哲而求得其所謂道其取材畜德當何如耶乃若足不出於百里目不接

一勝友抱兔園寒陋十數冊故書操舉子活套疊疊不
休之管以雄長於目不識一丁腹無一滴墨汁之輩之
中偃然自大曰吾以斯文自任前無古人後無來者有
識在側奚啻笑河伯之汨於秋水又迺嘆溝澮之盈於
屋雷人以為愧矣生謂之然乎其不然乎雅聞生年甚
少頃嘗習靜山寺奉母養志文史自娛俯仰今古蓋吾
鄰郡丹山之雛也豈不愛念嗟嗟人亦有言年近三十
憂老將至世事易纏糺光陰易懣懼忽忽淹留壯老逼

人打入凡俗隊中亦不難矣可不省哉可不畏哉蓋士學道而無師承祇以文字相誑誘者畢竟墮此耳某老矣嘗思得一佳士而寄意焉所以珍生者甚至生毋索高價於吾之門哉韓退之又將三沐而三薰於子須謹避之耳聊發一笑

與王翰林槐野論文書

劉繪

弟繪不佞多兄愛納為知己且不猥以卑俗謂弟為知文以是相見竟日不為別談商論文字不置每一論起

雖列瓊漿不注也披玄圖不睨也兄以天才絕調而嗜
文若斯則惡得不宏覽研奧而振名一代也前夕所議
未能畢陳今出省休沐敢為通記幸鑒鄙畧弟睹羲軒
以下文字咸發天地陰陽之秘人事之要家國天下之
務其理著明矣文不切所用則聖賢且渾爾靈爾安所
尚文哉故主須以理充須以氣其說尚矣弟謂辭者文
之質也理匪辭不達氣匪辭不營三者不可闕一焉而
體格在其中矣是以文之體格無定眡三者所究耳古

今之辭盡於六經理相統一韓子曰易竒而法詩正而
葩春秋謹嚴左氏浮誇正道氣與辭也天地之理中正
焉已矣其氣深厚和平其辭大雅宏暢則聖人之文也
六經是已孔子刪述自謂文王既沒文不在茲乎善學
孔氏者惟孟軻一人其後諸子理不足而任於氣故其
辭醇疵相襍荀卿以下莊騷太史董仲舒賈誼劉向揚
雄諸人窮理盡性雖不能如聖人而纂辭摹像則標準
六經故旨趣各隨所見而篇章音欵莫有踰焉東京煜

煜猶能相匹延及魏晉以後而雅道漸以陵夷至唐獨
得韓愈敏悟自言見時文忸怩不寧今讀其辭出入孟
荀而風骨類馬遷劉向曼然其品也藝苑英少亦有輕
訾詆者蓋未深究耳其後才桀之儔各殊其辭以求勝
欲自勒一家騫高者玄亢而無據崇實者質塞而無華
今六經之辭邈乎莫追求賈馬匡劉不可復得矣仲尼
曰文質彬彬然後君子蓋謂文焉弟又思漢以下至趙
宋能文者雖各異辭要皆變於六經且如董仲舒京房

焦延壽揚雄變於易也賈誼鼂錯司馬遷變於書也匡衡劉向下逮班固崔駰馬融蔡邕變於詩也臨諸子所著體而察之當自見矣蓋六經文之海嶽具焉後之士雖稱瓌竒而極駿雄莫能出其軌矣故惟狂蕩之辭沈洋洋靡之辭纖細峭刻之辭慘礪短長之辭是其理蔽其氣衰非聖人之書不可讀也弟又思建安諸子雖號靡麗然典峻不可少當稱為小雅之變二應以後六朝如二陸三謝至任彥升顏延年沈休文薛道衡輩世人

往往俱以纖綺眊之然鑄景凝華隱隱十二國風之變也宋儒詳於理學而辭則又落一格乃有古文今文之遼絕吁殆難語矣周茂叔通書程伯子定性書張子厚西銘正蒙則亦變於易者也歐陽永叔本論程叔子漢州策問數篇朱文公學庸二序疏明純正則亦變於書者也是以古今明文咸托辭以傳若雕藻剪綵爛然者斯可美也周子曰美則愛愛則傳詩曰追琢其章金玉其相謂錯采修辭也凡謂見偶語多者輒不喜此信然

矣專攻偶對令氣不疏非文之佳矣但弟思天地之數
奇偶而已八卦九章皆相對待是以乾坤日月星辰霜
露江海之支派山嶽之峰巒男女形像耳目鼻兩孔口
齒上下四肢百骸種種相對不夾蓋自然理數也豈於
聲音之道獨散漫而無合是以聖賢之文雖不專工偶
對而屬辭比義有不得不然者晦菴謂鄒陽書是作對
字彼方陳愬梁王欲自發穎慧鬱思求動其王而解於
難也乃謂西京之文衰自陽始誚之過焉嘗翫典謨宵

中星虛日短星昴五典克從百揆時叙惠迪吉從逆凶
無稽之言弗聽弗詢之謀勿庸詩參差荇菜窈窕淑女
五月斯螽動股六月莎雞振羽日升月恒竹苞松茂朱
英綠騰貝冑朱綬則鏘鏘艷艷聲色備焉後之文士揮
筆含輝敷采發摛理道豈不蔚哉但勿令若宋齊藻野
緡川以應詔令杏花菖葉宣於制策一時好尚致論卑
氣弱大損於治運儒道則文之厄矣至宋儒語錄深可
疑怪齊梁才士逸人偽為佛氏度化庸俗多為此語故

釋子有東林語錄盤山語錄此類且多宋人蓋因之也
是以宋儒之學多襍二氏翫其辭而不自覺蘇黃二家
才高學襍益難語矣弟於十八九時銳志效古文而乏
師友其藝業多不合於有司今幸得綴行於交游之中
時參金閨之彥承蚤晚雅論乃復得理舊緒承不棄又
深相善因吐管窺之見不勝慙慙前所示論序其列事
摘辭瑩瑩乎兩漢遺史也其外襍著記說間有曼羨泳
沫似喜鄙衍環淵之談矣弟繪固陋言缺首尾幸終令

音更宜細論如何

答祠郎熊南沙論文書

劉繪

叔仁兄足下都城外與傳觀遂同餞後音問遂杳見南
來士人即訪起居七月四日得手書情雅宛若弟亡文
辱虛推過實知嘉意引誨令人慚阻靡寧昨年冬弟赴
渝聞兄取道荊州喜甚急趨一會至則又相參差循江
訪之夷陵乃知先下武昌矣湘水蒹葭渺不可及悵然
入峽有懷若蘋守渝州甫一年新學吏道與百姓親悅

素寡材術無能施為獨幸風土去洛不遠鄙性恢恢多
可無甚不快之狀也此間州縣闕越稱多事簿書堆積
經史雖不敢離但不能專究心此矣數年憶兄閱覽益
肆常州職業清散所著必有大快心者一時士夫力興
古文兄可謂傑出矣來教云文字尚未可作劉敞謂歐
九未讀書弟慮元城頗涉誇矣今元城文字俱在與永
叔何如耶孔子曰辭達而已矣文緣理道疏其性情其
有述陳引喻或散或偶襍撰不同要之抽思就班累數

千百言期於明已意使信諸人也藻麗研深實盛華茂
自不能無使已意既達不必繁辭勦說務為馳騁若理
性不明而搜索異籍反為文之瘴也且如序

闕

最

為難

闕

贈送序記晉魏以前皆無韓蘇叙眼前事用秦

漢風骨筆力隨人變化然每篇達一意也今作者往往
一篇說三四端緒或文勢方行從中突起一二意使讀
者不識立論所歸至篇末彼作者亦自迷究竟滿漫齟
齬難乎收拾恐即所謂不能達也今有謂達者但曰直

陳去雕飾甚非旨也夫文章雕飾自不可少深厚爾雅
乃其要焉詩曰追琢其章金玉其相言文質也若夫艱
深詰澁不可句讀又文之僻也殷盤周誥書多脫簡間
有後人參入劉子駿謂朽折散絕博士集而讚之是也
弟又疑世之慧靈竒士詞雖不僻然過學韓蘇紆徐太
多沈辭鉤思營魄游心令人讀之少不體察則景滅響
伏而不得其意趣此雖天機逮意其綿邈寂寞終非示
我周行之義馬遷微婉處最稱玄澹然省文超徑非人

所及也今學士大夫與人談文有謂必購集異書多少
至列書目示人曰某與某未能見惡能為文哉弟蒙陋
謂此為以虛聲吶唱人可也謂此為心有閻蝕亦可也
弟誠非自委庸惰仰思先哲有可據焉古今文士大者
如莊周太史韓退之柳子厚其自叙所學皆止六籍而
下逮諸子蘇子瞻在海上以抄得漢書為樂當時漢書
士夫見者且少彼謂搜購異書收藏備學者格物一事
可也假令必謂盡見世所藏書而後下筆為文取異籍

所載資以粧飾侈麗則世有英妙弱齡之士無能錯采
凝玄先飛聲藝籍之林者矣仙釋二氏弟愚益不喜讀
蓋以非聖之書吾既不從其道却欲借彼之言為吾文
資不知所為文者將何為乎秦漢以前佛書未入中國
文士辭采煜煜後莫倫比石渠白虎諸儒各抱一經皆
能垂光百世故知為文夾二氏語者此唐宋間襍學之
弊也昌黎不道二家語其與二家言亦舉六經之言告
之子厚謂某秀才作文多引莊列頗奪正氣此論凜凜

至與二家言便盛稱其教而禱諸戒律毗尼之說此却不自覺也蘇氏記大悲勝相諸作盡入纂言復為倡語準楞嚴法華張皇博譬此子瞻涵曼乃不宜傳曾子固亦以此謝荆公也弟愚謂今之英哲鴻儔但抱殘經究其宏緒而屬文列事能準荀孟以下若賈誼董仲舒馬遷劉向則文可逼古人也若弟區區不肖何足為道庚子歲別唐應德丁寧祝我早晚必與叔仁相論謂兄思深而學博也今兄移官適就應德之居彼此又各暇豫

此天欲成其二美矣有書寄應德當為弟轉致江州閒
寂秋興滿懷襟詩二十首極知鄙俚萬里見意便中賜
報幸甚

與從姪桂芳秀才論記書

劉繪

書示桂芳姪昨議記尾數字未得與姪細論正為汝未
習古文耳名為古非但與舉業不同將與今文不同矣
直以舉業言之舉業貴淺淡平順著一刺眼聾牙字句
不可若古文正欲不與舉業同猶舉業正欲不與古文

同且如釋家梵語道家清詞法家招議曲家腔韻其命
意用字各有不同若今法家參一舉業語舉業參一辭
賦語便可笑爾近世古文法不傳世人亂作任意漢參
入唐唐參入宋乃如以釋入道以道入法以法入曲以
曲入時文作文其誰辨之即能辨之其誰信之也昨均
田記平平叙去未敢盡用古人法却恐艱澁難讀不便
觀覽者至末二行畧為蟠拏頓挫見文字性氣不然只
如食肥肉一噉可盡不知高賓乃取雞肋是為足低徊

咀嚼矣記尾謂太守獲上有知己者所以將前役盡付託之不拘以文法太守乃得出胸中之奇克襄此大役也為咏歎褒獎之意須知橄欖味方可語此亡奇張敞傳曾臆結約固無奇也徽字是用易坎象上六係用徽纏文墨即文法可報公不必更易為妙他日遇知者許茲文當在此數語可耳

東曹紫峰

侯一元

伏誦還教文采絢爛上下馳騁數千百載若運指掌即

此尺牘亦足使人愛玩文之至也自孟軻七篇非門人所
述漢唐以來崛起雄鳴於世者比比然也宋玉遭毀乃賦
陽春揚雄慕古悔其少作英雄玩世類非誠語由今觀之
悲秋之調不離楚聲太玄之撰特變音節雕蟲篆刻故步
猶存惡在其悔之也昌黎云已所大慚人以大好豈謂光
範三書等乎太白陋其大鵬賦至欲燒焚何不更作而直
並存於世貽其慙陋也故僕以為盡英雄玩世之語雖然
吾文也有涯吾意也無涯諸賢之不自慊豈不亦有誠然

者乎至如吾兄專事靳固從人索毀搗謙之美固絕百代
雖至寶不容韜襲亦恐異時石鼓不完竹書相亂將貽後
賢之歎息也何以明其然耶始僕於鹿城見兄贈雪牕道
士詩竒之竊歎兄以長吉之才發盛唐之調富而不靡竒
而不怪可謂傑作客又言某壁蜃江行者亟往索之主人
則亡之久矣今不識此草兄尚能存否也夫人壽幾何而
俟河清歲月逝矣猶冀來日斯不亦過遜左計矣乎弟之
於凡無能為役徒以臭味不敢自外竊附建安諸子之

區區存其敝帚耳如秋至寒蟬疲曳鳴咽斯亦情之至
悲也語云誰為為之孰令聽之惟兄知我恐一日解綬
不復嗣音惟亮察

東晁春陵

侯一元

某東海顛蒙之鄙人也獲落無用而有嗜古之癖自五
六歲知書迄今四十餘年矣中歲則嘗妄意於道屏諸
所嗜自以一切可引却至古文歌詩則如饑之食寒之
褐意固護不能去嘗竊以物有天性古文其非吾之性

耶獨何以篤至若是因妄謂文道一致耳言不文即其道腐道而畔即其言也竊以是雖齒腐髮落而嗜不衰然而未嘗出以示人雖先達如漁石唐公古冲李公枉見知賞誘引諄諄而未嘗一獻其所作若此者於鄙意蓋有三焉敝帚自貴古今通弊他人業書愈進則愈益僕業書愈進愈損當其得意未始不欣然也信宿視之則已厭去是以篋中之藁每欲燒焚而又以精力所成濡遲未忍冀以來日悉加芟潤或可以示子孫至於他

人固不敢出恐以僕自多河東之美貴其白豕也此一事也又僕竊見古今之士類多相襲步步趨趨以為肖似顧索之毛物則是矣神駿蔑如其不然者即又肆筆矢口同波末世僕於蔡白石文序中具道之僕平生古文所最好者莊老遷固雖才拙不能效其一語然至於末世之文則觀之惟恐卧也誠思一遇其人相與議於牝牡驪黃之外而行求天下數十年而未有得僕即有所成亦安敢以幽人土鼓揚摻桑濮之堂乎此又一事也

夫文者何也人之言也言者何也人之志也故有不得已而言善者鳳律不善者梟噉其皆有不得已焉而聞者自得其美惡言者蓋不知也故言有不能不聞而不可以求聞言而求聞者其惟俳優乎呈能鬻技斬以入人而不知其言之所自出可哀也僕幸無饑寒之累又蚤知身名輕重不忍以隋珠求雀故每默然退處於無事而無恨色此又一事也僕懷此三者將終身焉誠冀餘生有下中之壽掛冠解組勅斷家事獨攜床頭老易

遍遊名山以伸其志然後陶情鑄意俾平生臭腐一化
神奇非敢望高揖千古亦庶幾不并腐草木儻得如伯
牙暫遇鍾子郢人一對匠石無復恨者矣否則揚雄期
後世子雲莊生齊萬世旦暮此僕之心也乃近者蒲柳
之質日變以衰牙齒全豁鬚髮漸白追存平生親愛多
為異物身非金石必且銷毀而僕進則方嬰簿領退則
未畢婚嫁恐一日楊生於肘神乘於馬則素懷長負終
不得抒憤懣以酬天地則私恨無窮迺遂以暇日命子

弟悉蒐舊草為十四帙詩六文八間有觸時妄發存而
勿闕以俟論定春蚓秋蟲非不知其猥雜亦各其韻也
積而藏之以示子孫焉雖然僕聞之風雲龍虎以性感
水火燥濕以類應僕於當世鉅公酷肖遷甫者不能好
也乃獨心醉於大賢時時窺見一斑歎其蔚跂以為妙
絕比觀聚樂堂編不拘拘遷固牡驪既已相隨絕塵矣
此僕所謂其人也越人有言心悅君兮君不知敢獻所
撰拙帙十四隨滌器以見於堂下惟少垂覽焉

答熊元直檢討

薛應旂

昨都下之聚過承念舊依依不舍然亦各有人事往復
總不能劇談細論如豫章時矣南還又承遠餞委曲雅
誼何以當之留都事簡易於習懶京師一切書問將作
復止雖知已如元直亦遂踈濶抱歉何可言既辱書惠
并示諸製啟函讀之如對元直甚慰遠懷鄙人無似百
無所成惟從事於文頗專且久茲雖屏去尚知一二敢
獻愚衷古昔先王未嘗有意於為文六經之作所以闡

天地之藏發心性之蘊紀綱人事維持世道真如生人之飲食裘葛不可一日闕焉者皆不得已而有言非無用之空言也孔孟繼作亦若是焉而已戰國秦漢之文人始各逞其辭說以馳騖於天下中間雖不無可觀而要之至理率多悖繆蓋皆無得於心而有意於為文徒以華世鼓譽而無益於民生日用是豈先聖賢之所謂文哉唐宋數家雖其風容色澤畧貶於秦漢而意義所存則或有庶幾於道者奈何今之為文者動稱秦漢而

修詞造語依傍影響如小兒之學舌優孟之作叔敖而
自己之肺腸心膺得之於稟受者反若為其剗而噤不
能自出一語可笑也其有稍知此義者則又高自標致
務為杜撰而於古人之成法一切抹掇自謂成一家言
擺脫習氣乃顧為支辭蔓說反有晦於明白簡切之理
則又幾於因噎廢食者矣然則必何如而後可孔子曰
辭達而已此千古為文之準則也故為文者若胸中真
有一段意思直是見得透徹不得不發者惟據吾所見

而直書之意盡言止不較工拙自是有用文字使本無
可言或言而必欲隱伏避忌則固當涵泳停蓄正不必
綴緝支吾而虛費精力為此無益之事元直以文為職
者固未免有應酬之作但中間亦自有隨機發明道理
處不有益於人必有益於己庶不為無用之空言矣易
曰修辭立誠韓子曰仁義之言藹如元直但立誠學仁
義則不患文之不如古人也恃在知愛不覺狂露惟采
擇之

駁喬三石論文書

王維楨

鄙人所撰述竊自知陋以視他人率皆面謾故以投公
誠謂能指迷發昧令不乖所適也乃今所稱予我者一
非我所有不副本初就正之意與他諸面謾者未之或
殊即公自以為業已命之然不能令僕信也何也今海
內翰卿墨士彬彬然興矣其擬則史遷之作者不可勝
數往往藉格襲詞猶之畫臨粉本書摹法帖求一毛之
似幸半體之同以為奇絕固未有蛻棄陳骸自標形神

者也。劉稱僕云：第取其指，不襲其跡。此神化之道。僕安能及之，而謾以相加也。文章之體有二：序、事。議論各不相淆。蓋人人能言矣。然此乃宋人創為之。宋真德秀讀古人之文，自列所見，歧為二途。夫文體區別，古誠有之。然固有不可歧而別者。如老子、伯夷、屈原、管仲、公孫弘、鄭莊等傳，及儒林等序，此皆既述其事，又發其義。觀詞之辨者，以為議論可也；觀實之具者，以為序事可也。變化離合，不可名物。龍騰虎躍，不可韁鎖。文而至此，即遷。

史不皆其然乃公亦取之加僕何言之易也晉人劉勰
論文備矣條中有鎔裁者正謂此耳夫金錫不和不成
器事詞不會不成文其致一也文之不易言也若是僕
安能及之日來誦覽大撰數篇總之整雅宛密厥初營
構布置費心力矣因取遷史較之則遷乃疎鹵矯健門
塗雖殊而要妙均也自僕繹思遷史累年禊矣然或由
本以之末或操末以續顛或繁條而約言或一傳而數
事或從中發或自傍入意到筆隨思餘語止凡若此類

不可毛舉竟不得其要領乃今觀公之撰如此則作者
自命可也何必古同哉且公少時即好習古文詞到今
猶辭云未能也而僕習之又最晚重以性資學識並謝
上才豈克有造哉嗟乎已矣初計出城得乘間一語比
山游復以賞眺妨焉然中曲念之幸承劄諭聊此佈復
自游歸便爾多俗不能更往為別倘軫教懷無悵嗣音

與聶雙江張岳

錢令過敝邑辱賜今年鄉書洋洋乎其言之也披卷疾

讀心豁目開然其中有可疑者不能默默太抵今之論
文章者必曰秦漢蓋以近時之軟熟餽釘為可厭也講
讀者必曰自得亦以傳註之拘滯支離學之未必有得
也夫真能以秦漢之文發其曾臆獨得之見洋洋乎通
篇累牘而於根本淵源之地未必實有得焉君子未敢
以作者歸之也况所謂秦漢者乃不出晚宋之光新稍
有異於今之軟熟者爾實亦無以異也暗鬱而不章煩
複而無體奔走學者於誦誕險薄之域反不若淺近平

易猶得全其未盡之巧之為愈也秦漢之文見於班馬氏所載多矣其深厚醇雅之氣明白正大之體曾有一言一字譎誕乎哉今之自詫為秦漢者恐未必於班馬之書有得也有得於中則其發也必不掩矣乃欲厚自與而疑學者其亦可悲也夫自得之言出於孟子其意亦曰漸漬積累自然有得爾夫豈必於排擯舊說直任習臆所裁而謂之自得哉三代而下數聖人之經秦火之後人自為說至程朱始明矣雖其言或淺或深或詳

或畧然聖人遺意往往而在學者不讀之則已如其讀之也豈可不深造而致其詳詳讀古人之書而有得其淺深詳畧之所存意有未安姑出已見為之說期於明是理以養一心而已矣不在創意立說以駭人耳目也有是心而言又未或當其自蔽也甚矣嗚呼學之不講久矣文章議論古人講學不以為先也今也窮日力以從事於此猶不得其要領况其遠且大者乎此類得失本無足辨然場屋去取學者趨向繫焉新學小生心目

謏薄一旦驟見此等議論必以為京師好尚皆如此其弊將至詭經叛聖大為心術之害有不可不深憂而豫防者伏枕無聊故一伸其拳拳之喙伏惟裁教



欽定四庫全書

集部

明文海卷一百五十三
四

詳校官編修

臣錢樾

主事銜

臣徐以坤覆勘

總校官庶吉士

臣倉聖脉

校對官助教

臣蔡鎮

謄錄貢生

臣朱鎮

欽定四庫全書

明文海卷一百五十三

餘姚黃宗義編

書七

論文

與項甌東

王慎中

僕所遣人還自三山得奉答書甚慰方遣人時正與洪君語度其不及不意及也而公於治行匆匆之際復教詳至如此不但仰感情誼之殷又以竊知有道者所養

從容暇豫終身無造次之時與所謂前定而不困者固
此事也來教所云孔老異同而為文者不當襍出於老
子而當一於孔氏之言其所及孔氏之得失雖未得其
精要而欲學者一於此而不出入於彼義則正矣老氏
得失今未暇答公書本非為老氏發故亦不必答也惟
所以論為文者其義雖正而於識不為達也文之為道
固博取而曲陳惟其所以取之者雖博而未嘗不會於
吾之極故謂之約其陳之雖曲而其義主於正則曲而

不為雜南人周任之言每舉於孔子以孔子之聖豈不
足以矢口為言而於前人之言時有舉焉所舉雖前人
之言而其意則吾之所欲言者矣龍子公明儀之言往
往迭見於孟子而陽虎之暴其言亦有可以發者老氏
之賢固加周任公明儀龍子而南人之陋陽虎之暴又
不論矣惟其有取於老氏而皆出於孔子此所以為學
孔子者之為文者也今稱述必在乎經援引必則古先
王如書生科舉之文者豈不為正而豈可以為文而亦

豈可以謂之知道者哉有甚似而實非有大反而正合非獨文然凡人之事業功行皆若此矣非公之明何以語此義則序已付黃生入梓矣先此呈覽僕於此亦自謂不為苟言者公得無又以其雜出於莊周而病之耶有以見教毋惜便風千萬之望

答茅鹿門書

唐順之

熟觀鹿門之文及鹿門與人論文之書門庭路徑與鄙意殊有契合雖中間小小異同異日當自融釋不待喋

喋也至如鹿門所疑於我本是欲工文字之人而不語人以求工文字者此則有說鹿門所見於吾者殆故吾也而未嘗見夫槁形灰心之吾乎吾豈欺鹿門者哉其不語人以求工文字者非謂一切抹撇以文字絕不足為也蓋謂學者先務有源委本末之別耳文莫猶人躬行未得此一段公案姑不敢論只就文章家論之雖其繩墨布置竒正轉摺自有專門師法至於中一段精神命脈骨髓則非洗滌心源獨立物表具今古隻眼者不

足以與此今有兩人其一人心地超然所謂具千古隻
眼人也即使未嘗操紙筆呻吟學為文章但直據骨髓
信手寫出如寫家書雖或疎鹵然絕無烟火酸飴習氣
便是宇宙間一樣絕好文字其一人猶然塵中人也雖
其專專學為文章其於所謂繩墨布置則盡是矣然番
來覆去不過是這幾句婆子舌頭語索其所謂真精神
與千古不可磨滅之見絕無有也則文雖工而不免為
下格此文章本色也即如以詩為喻陶彭澤未嘗較聲

律雕句文但信手寫出便是宇宙間第一等好詩何則其本色高也自有詩以來其較聲律雕句文用心最苦而立說最嚴者無如沈約苦却一生精力使人讀其詩祇見其綑縛齷齪滿卷累牘竟不曾道出一兩句好話何則其本色卑也本色卑文不能工也而况非其本色者哉且夫兩漢而下文之不如古者豈其所謂繩墨轉折之精之不盡如哉秦漢以前儒家者有儒家本色至如老莊家有老莊本色縱橫家有縱橫本色名家墨家

陰陽家皆有本色雖其為術也駁而莫不皆有一段千古不可磨滅之見是以老家必不肯勦儒家之說縱橫必不肯借墨家之談各自其本色而鳴之為言其所言者其本色也是以精光注焉而其言遂不泯於世唐宋而下文人莫不語性命談治道滿紙炫然一切自託於儒家然非其涵養蓄聚之素非真有一段千古不可磨滅之見而影響勦說蓋頭竊尾如貧人借富人之衣莊農作大賈之飾極力裝做醜態盡露是以精光朽焉而

其言遂不久湮廢然則秦漢而上雖其老墨名法雜家之說而猶傳今諸子之書是也唐宋而下雖其一切語性命談治道之說而亦不傳歐陽永叔所見唐四庫書目百不存一焉者是也後之文人欲以立言為不朽計者可以知所用心矣然則吾之不語人以求工文字者乃其語人以求工文字者也鹿門其可以信我矣雖然吾槁形而灰心焉久矣而又敢與知文乎今復縱言至此吾過矣吾過矣此後鹿門更見我之文其謂我之求

工於文者耶非求工於文者耶鹿門當自知我矣一笑
鹿門東歸後正欲待使節西上時得一面晤傾倒十年
衷曲乃垂夜過此不已急乎僕三年積下二十餘篇文
字債許諾在前不可負約欲待秋冬間病體稍蘇一切
塗抹更不計較工拙只是了債此後便得燒却毛穎碎
却端溪兀然作一不識字人矣而鹿門之文方將日進
而與古人為徒未艾也異日吾倘得而觀之老耄尚能
識其用意處否耶并附一笑

又與洪芳洲 唐順之

近來覺得詩文一事只是直寫曾臆如諺語所謂開口見喉嚨者使後人讀之如真見其面目瑜瑕俱不容掩所謂本色此為上乘文字揚子雲閃縮譎詭欲說不說不說又說此最下者其心術亦畧可見眉山子極有見不知韓子荆國何取焉近來作家如吹畫壺糊糊塗塗不知何調又如村屠割肉一片皮毛斯益下矣試質之兄其有會焉否

答華補菴唐順之

鄙人不敢刻文心事具見於所與王南江書及與令

闕

安子介言之已詳執事諒我此心久矣而益泉大尹忽
為此迂濶之舉昨有書道心事於益泉如石沈水竟不
見答鄙人罪謫之餘也傳曰身隱矣焉用文之罪謫之
人自合閉門杜口豈宜以文章自名又豈宜以大書刻
木以標榜於世且所謂罪謫之人者其於當世尤最得
罪於勢要有力之輩而益泉為之刊刻文字是昭其與

罪人比而與勢要有力之輩異其好惡也豈惟非僕之福其為貽累益泉亦甚矣平生本不能為文此心自知而一二相知偶以為可虛聲所集衆謗遂歸誠以文者豪士之所競而名者造物之最忌譬如支離侏儒之人本無拳勇不能格鬪偶爾嬉戲扭首搖目舞腕曳脚而里人不解事者見其盤旋之影從而悅之悅而獎之以為有拳法而道之於人至使當世拳師打手疑其鬪已叢起而譁之不知彼固支離侏儒人耳且彼固自知支

離侏儒人也何嘗自謂有拳法其亦何心與人鬪勝負
哉獎者逐影疑者附聲世俗可笑大率然也僕之得名
與得謗何以異此雖其疇昔知厚之人猶或不免睽目
相猜怒僕自度本無可致猜怒於其人者祇以不合簞
弄筆舌及不合盜虛名之故耳邇來深自悔其少時篆
刻之技經年束書閣筆絕口不敢道文字以自附於村
野不識字人而後為快如侏儒矯前日嬉戲惹事之過
手腕亦不一出袖口自謂庶幾免矣柳子厚云豈可使

叟叟者復入吾耳而益泉乃方為之刊刻行世以豎拳
法之赤幟而滋拳師打手之疑譁既與僕私心相戾其
於益泉亦何益焉僕之私心尤有所不可者平生所與
交游書札率如戶外二屢密相規告之言今乃大書刻
木以翹人之過而彰已之訐直豈惟心所不安其何以
覷然與友人相視乎雖友人素多善類不以受盡言為
諱然在僕則不可也內量之已外量之人量之人者此
書盡之量之已者與南江書及前與益泉書備矣量已

量人無一而可因知益泉之必相諒也

答蔡可泉唐順之

別久不勝懷念每於士大夫往來間得聞兄政聲善譽為慰僕自正月冒病今尚在牀也二月三月之間瀕於死者三四已分與世長別今漸有生意然精神則益耗矣蓋外腎癰瘍痛楚不堪之故也來書所示刻文一節正以此事為錫尹卜君所苦極費口舌近忽得遵巖兄書又道及紀山刻文之說方輾轉無可奈何欲託洪方

洲百方止之而來使適至是造物者亮我之衷而賜之
便也知我莫如兄豈待多言固知此事之必廢罷矣僕
不才豈敢以文字市聲名於世者哉山澤迂僻之性每
閒靜中得一適意形骸之外則覺此身亦是贅疣而虛
名果是羶氣不能早自晦匿使野人姓名尚有聞於世
間以為此身之累不及古之織簾拈笛之流使人不得
知其姓名者每自笑前生業障之厚也其又敢以文字
市聲名於世也哉即使欲以文字市聲名於世亦其文

之最工者而後可自古文人雖其立脚淺淺然各自有
一段精光不可磨滅開口道得幾句千古說不出的說
話是以能與世長久惟其精神亦盡於言語文字之間
而不暇乎其他是以謂之文人僕不能為文而能知文
每觀古人之文退而自觀鄙文未嘗不啞然笑也半生
簸弄筆舌只是幾句老婆舌頭語不知前人說了幾遍
有何新得可以闡理道而裨世教者哉此皆肝膈之論
非苟為謙讓以欺凡者愛我如兄如曹君雖欲使吾文

不朽吾文其能不朽乎否也凡試觀世間糊牕櫺塞瓶
甕塵灰朽腐滿牆壁間何處不是近時人文集有誰閒
眼睛與之披閱若此者可謂之不朽否耶本無精光遂
爾銷歇理固宜然設使其人早知分量將幾塊木板留
却柴燒了豈不省事可笑可笑兄書中有發明性真開
示來學之說僕又非其人也且所以發性真而示來學
固絕不在言語文字間行已多缺而強飾之於言語文
字此性真所以益鑿而先輩之所以悞後學而昧其目

者也僕自三十時讀程氏書有云自古學文鮮有能至於道者心一局於此又安能與天地同其大也則已愕然有省欲自割而未能年近四十覺身心之鹵莽而精力之日短則慨然自悔捐書燒筆於靜坐中求之稍稍見古人塗轍可循處庶幾補過桑榆不盡枉過此生居常每自笑不能敝却精力以求文之工然竊幸其文之不工而稍蓄餘力亦尚可以他為也是以語及文字輒茫如隔世事或不得已應酬一二篇亦信意打抹真所

謂老頭巾矣以少年欲求工於文而文猶未工況於今日意興若此則宜益淺陋無怪也不識曹君何取乎今曹君已去此事行止皆在凡手相知如兄而復不能信我此心必欲為此業障以增牆壁間之一塵而後為了事則與凡二十年之交便可告絕矣寫錄多訛誠如兄言嘗欲稍改差字留一正本藏之於家又自以為本無足闕繫於世訛不訛不論也且捐書燒筆亦已多年既無正本又無新彙誠無可以應凡命者奈何至如遵巖

之文則必不可以僕為比。遵巖以絕世之資，又用力專而且深，故其文雄渾雅奧。自北宋而後數百年間，特然傑出，以名其家。所謂能不朽者也。惟單刻此集，足為文章家指南，而一洗近世文妖之弊，正不必以吾疎庸之文溷之也。尊翁老先生表文原有今春之約，平生不敢與人不信，而況敢不信於吾兄乎？但自正月到今，圖死不暇，是以未能執筆。倘病體復得為完人，必於今年寄奉也。

論文書舒芬

文章家辱不以芬無似詔以作文法是欲引而升諸莊
騷太史韓歐之堂意則盛矣然芬竊有見焉典論失大
本莫適主也不足為文章家稱說唐人不知韓子曰愈
以六經之文為諸儒倡雖愈何敢望六經之文哉宋儒
祖是論紫陽朱公亦云六經治世之文豈不知易之興
也當商之末世而風雅多夷王以下詩乎春秋則又遠
矣目之以文且不可況驟論以治世乎老兄之論要亦

未離此義恐古文當始於逍遙遊諸篇而昌黎則大成矣六經未可以文法摹倣也書禮紀述即事見道風雅咏歌以聲和律曾何句法章法不類之顧耶易始伏羲不知六畫竒耦其句法章法果安在耶春秋仲尼所筆削也簡者一字繁者僅三十五字其句法章法果安在耶故今之論文者動稱六經則亦前人悞之耳愚嘗以六經當以道論不當以文論此也惟是記誦不勤體認不明躬行不誠而求文擅作者之場未之有也蓋無記

誦則古今上下禮樂名物器數無所証據無體認則天命人心之微王道霸術之幾無所適從無躬行則施設注措之畧操縱闔闢之權欲布之筆札之間而信於宇宙環海之內必一出入而無親切有味之辭也韓子曰本之茂者其實遂膏之沃者其光煜仁義之人其言藹如也吾取以為法是耶非耶非也則大鵬圖南而培風怒飛莊生之說信荒矣芬謂作文而主是三者則遷固不足多也苟不循其性而漫焉曰六經之文六經之

文則不獨為邯鄲之步也法言中說為子雲仲淹平生之累矣伏惟終始教之

寄後渠

顧璘

郵使還得手書甚慰久絕同心之言奚翅如蘭把玩不忍釋公果悔嗜酒攻文之癖則萬年之慶然結習極難除恐見獵復動耳如何如何文序詮古人之文死者自當心服璘精神衰耗祇見此道非用力可盡所謂得之於心應之於手雖陳言然至理實不出此譬之聖人之

道動容周旋中禮者安有點檢其間必至耳順從心乃
神化之域也作者其始病於有意其終病於有迹自曹
丕立意為宗一言啓六代雕鏤無窮之禍孟子曰始作
俑者其無後乎五經四子姑勿論歷代文人吾所深服
者屈原莊生荀况賈誼太史公其人皆直吐曾次無所
鑽研粉藻於筆墨豁徑故文詞明直意味深永可續諸
經傳視左傳國語猶夷惠也其後韓愈氏獨得其宗當
觀其原道諸作為的若進學解諸文必其少作未可論

定宋歐王蘇氏父子所見甚確老蘇得矣王傷刻歐蘇傷易乃其天性使然猶師商之過不及不可深病也六朝之非不俟更談若揚雄王通與柳宗元諸君皆見其末未見其本柳氏晚年覺之故柳永之作極可誦惜乎不久而遽沒也詩則風雅之後惟漢十九首及建安得其傳兩晉若阮陸左郭靖節諸公猶有存者可怪宋謝氏一出倡為刻畫鑿死混沌即他日西崑之義山學者靡然從之而未流遂至陳隋之靡麗古風盡滅可為痛

哭至唐陳李崛起蘇州繼之真可謂大雅工部及王岑
諸公格律雄健當孟氏泰山之巖巖謂非聖人之徒哉
高氏品彙既題李杜曰大家而別於正宗未盡是也僕
衰矣無力供簿書矣得遂贈典後將請歸去計與足下
相對無時因貴鄉馬司諫便輒奉此書望賜教訂以代
面談餘惟加愛是願

論文書

顧璘

僕聞達者痛乎卑俗狂士亟稱古人雖傲睨凌厲廢中

和之經然曠志峻節固一世之雄也僕度德程力不逮
懦夫豈敢望此事哉然思不弛心語不輟口著之毫楮
呈之友朋至再三而不厭冀豪宕之士一進乎此使已
攄懷古之幽情釋悼世之積忿耳何必在我耶夫文章
士之業也孔子修六經以建百世之則而百世弗能述
蓋折衷理道之極經緯天地之章子淵不能得其止游
夏不能贊其辭身沒響絕亦其然耳下是左氏蜚聲於
東周莊生逸響於蒙土靈均哀鳴於漢上太史建議於

西京誼舒子卿淵雲褒向揚芳擷藻前後相屬而漢之
文章炳然於金馬石渠之署雖純疵相形遐邇異趣要
皆作者之殊列也烏可訾之哉僕雖殫力竭智不敢望
其下體然仰探六經下逮數子未嘗不拊膺擊節悵然
遠懷執事之才百倍於僕其於古人皆可超其躅而拊
其背頃者獲讀拘虛集所載才麗學侈誠今聞人也惜
其選義沿近習體物乏沈辭比量作者尚出其後豈徇
俗之趣未盡納諸古哉獨長書十餘章宛悉情事讀之

恨恨填詞數闕軋諸宋人吾愛之重之而不為執事稱者先其大耳夫今之同志寡矣同志如執事才且茂異復爾乖刺誰能默默蓋登危者駭步入靜者疑影今之視古豈特危與靜已乎吾恐既疑且駭則必反走而下趨矣執事不棄譴陋惠然下問僕亦不揣本末謬進不慚之言蓋友道貴直諒君子之愛人非苟為姑息而已昔劉季緒才不如諸賢而好詆訶文章曹子建論其非吾固謂子建失論也今有南威西施之容畢粧而鑿焉

鑒之所不及在側者能誨之豈在側者之容固美於南
威西施哉妍媸都鄙其辨一也如有不自美其容者僕
能效在側者之勤矣執事毋內罪之

與少宰王荆門公書

董份

頃方具啓付之小孫恭達記室而僕輩從舟北上恐其
稍遲故因徐壻遣人復為附此昨兒還道我公欲得鄙
人舊橐錄成帙而備覽觀焉因盛言公之意甚勤其屬
之甚切份豈有敢辭者然向來交遊不知其不肖欲探

其橐而出之者多矣而份竟不敢出即兒醇自以其意
請者亦數十百矣而份終不敢出斯何物而欲秘之哉
其所以然者蓋份少嘗讀古人之書頗能窺作者之意
究文章之旨亦嘗畧得蹊徑輒不自量而欲妄追往昔
成一家言此其蓄積者大矣顧其才有不逮性復多病
大槩每歲伏枕者踰半心慊慊不自持故不能竭精畢
力以副其意而徒因世俗黽勉應酬聊以塞責免咎既
而展誦則曩之所得蹊徑者非但不能踐迹而且往往

背馳相去天壤矣是以既成之後每當一讀輒復自慚
惟以錄授其人不復更存其副即成者亦不自愛惜其
間散落者多矣嘗以文自秦漢以來必有蹊徑得其蹊
徑而既得登堂又能入室者此古之宗工大家卓然傳
後世而不朽者也得其蹊徑而未能遂臻其堂室者則
或傳或不傳後世或尊稱或否者其次也其有未得蹊
徑而才亦足以自騁氣亦足以自凌有不得亦有偶得
則雖不能以必如古人必傳後世而亦足以名擅一時

者此又其次也而世之人才不足稱氣無可取不過巴人下里耳而惟其不知蹊徑也故不自識其合否不自解其是非而落筆不休覩顏自許凡忝仕籍必梓一編人或憤之至欲借秦火餘威投之者言雖若過而其多已甚則其可厭亦宜也今份畧知蹊徑而才與氣不能副之匪惟堂室即藩籬未越焉故深藏而不敢出亦庶幾古之知恥者耳而公不察其心數加慙懣而徐壻秦時之奉使也公寓意尤勤且切臨別囑之再三且云子他

日使還赴公車而見我當即以是為贄矣於是徐數過請之兒復跪而助其請焉以為公在交游則舊知在文章則識者今從數千里外數致勤倦而數謝却之恐非古人所以待知己之誼而取正有識之心也且秦時方鼓篋公門將藉手以見長者倘不得此則何以復為贄之命耶況古之子弟其家大人有一言必謹志之有一善必謹紀錄至勒之彛鼎示之子孫而醇不能自喻其誠未遂所請使家大人所著未一布宣則醇之不孝深

而死罪莫贖矣且家大人自謂不能竭精畢思而數十年精之所勞思之所構實亦在此將天之意未肯遂泯斯文而假之有識舊知以回其深執不然之悃未可知也份因其言輒亦感動遂忘其恥而稍緝閱之則數十年間棄置已久南還舟潤而篋封不啓腐敗頗多蓋平生散落者十之四腐敗者十之三而鼠啣蟲蝕漫漶不可考者尤多焉所存直一二耳而類皆手書諸無副本壻雖遣人繕寫大畧亦十餘冊矣適嘗校之則漫漶者

腐敗者必沈吟記憶可漸補續而所遣人亦復自多謬
誤更須屢校乃得無訛而份病雖漸瘳元神未復不能
遂勞恐當淹至冬初方能再遣馳上也頃者繙閱之始
兒見其漫漶駭而欲泣曰今尚若此使踰數載當復何
如茲令醇得稍為加哀而獲免於不孝之萬一皆大造
之賜也是以與壻喜躍而深感焉欲刺骨矣而不知份
雖下慰兒女之私而上貽知已有識之醜傍萃儒林藝
苑之譏則份感雖固深而恥實增甚耳病久精力甚乏

不能剪裁遂致蕪蔓且因公通家誼篤故以家人語進
焉惶恐惶恐

復王沂川書何良俊

恭承嘉問為日久矣第株守海上無緣得一瞻奉以聆
清誨繫仰之私何能有忘耶適令甥來緘至教札惠訓
諄復獎與過情乃知大雅舍弘降意末品如此感服感
服且得捧讀佳集格製精嚴藻思綿縟誠藝林之鴻構
也冗次未得卒業亟讀三四篇若函牛之鼎嘗其一爨

固足以厭小人之腹矣更諭以編選我明文章此豈特
為先生不朽之大業實亦昭代華國之永圖甚善甚善
但尊諭以篁墩文衡為斤華摘實故欲專以昭明所選
為例小子之見則謂言而不華誠不足謂之文苟使華
而不實則又何所用之必也體備質文辭兼華實庶乎
彬彬可稱而編選之家亦不失為通方之論矣且文章
所稱敘述詳雅則史漢為之宗藻思纏綿則齊梁擅其
美碑頌當取模於崔蔡序誌必駕格於韓蘇兼是數子

融貫通徹而以時出之然後足為藝林之宗工僕徒有慕於昔人終瞠乎其莫前而不得不有望於先生者也文選目已得細閱詩類似專重樂府雖古詩亦僅僅數首近體則全不入選試觀昭明之集樂府特十之二三而游覽行旅雜體居其七八今何太畧如此亦須稍廣之夫詩之體格以時而降即陸士衡顏謝諸作中間率多排比已為近體之濫觴矣今安得獨遺之望嚴校嗇取亦編入數百首庶乎體裁斯備而後代可無遺憾文

評一編校練可方談藝錄評撫足擬詩品乃近代作者
一案斷自媿小子亦得廁名其間夫青蠅飛於堂序竟
日營營不踰尋丈及其集於良馬之尾不崇朝而自致
千里其所附者善也乃小子何幸如之長谷近作如布
賦六朝聲偶集序等篇皆可入選幸錄之僕近補刻說
苑序一篇敬用呈覽伏惟刪潤以備采擇草次布復千
萬照察不宣

明文海卷一百五十三

欽定四庫全書

明文海卷一百五十四

餘姚黃宗義編

書八

論文

答陳魯南太史論唐人詩文

馮一龍

古之作者文若六經孔孟詩若三百篇離騷又何如其
次也漢魏以下韓昌黎柳柳州之文辯博雄肆李謫仙
杜少陵之詩豪邁雋逸唐人粗可傳誦使天下後世不

敢美惡置喙者惟是四子而已然柳已不及韓杜不及李其間幾微之相去千載無人招四子精爽於几案間與之論折其衷余每見古人製作妙在意與趣耳意趣之妙復所得有最次若柳州意在文而昌黎無文文以達意而意不留少陵趣在詩而謫仙無詩詩以發趣而趣自成故凡意趣自然之適若決河防橫潰四出而其縱橫曲直廣狹淺深無所往而不洋溢滌洄以為湍瀾以為澤凝澄為淵沚衝激為淙決之殊西東搏之而使

上下變不一而體各足此無他其本裕而其出無窮其
用不竭其幾不息其勢不可遏有如此者故古人之不
可及在意趣意趣所至而充其才以張弛造化出入古
今貴其在我者有本也本之不裕則吾奔走受役於章
句聲韻之末牽引附合勞攘百倍而筋力憊矣蓋吾身
與衆物等而心統衆理為天地萬物所同出之原其體
至虛包涵受納無物不備宇宙之大日月星辰山川草
木鳥獸蟲魚昭著於上下者皆吾身之所有取其所有

以為適感者應則感無常而應常裕本之在我為意為
趣而物與我自相參焉然意發於內其機觸於有感趣
得於外其妙通於罔覺故有感之機動於天罔覺之妙
入於神惟神惟天斯可以言作者否則文焉詩焉或狃
於意而不化或徇於趣而自苦其下相禪以為能家所
竊不過古人糟粕無復有自其心出者此猶借西江之
水汲以盈轍而引之使流其進不能踰井編所緒出者
不能蔽牛跡方寸之葦汨刺其中則徃過者不能續何

也非其所自有也所得幾何哉四子以下相襲為世痼
久矣公能脫去病根入柳杜之門而庶幾可登韓李之
堂猶惜少時束縛就舉子業雖得知本之學而其充實
發越處或未盡此心之量僅與唐人比之亦是限於命
者

與達時明余子南等論文馬一龍

來諭時文古文某不諒諸兄何見也豈以科舉中式者
為時而以碑銘叙記詩賦者為古耶殊非知道之語前

輩論文章以理為主以氣為輔而作文者必先立意然後定格然後命詞意為上格次之辭為下時文古文一也其中式則時文有排比對待之病但意在格中何憂不式格高意病雖式不文若排比對待必有意義不害其為時亦不害其為古耳立意淺近雖三墳五典之體繫傳檀弓之言無裨於道無關於世教安在時與古之間吾未能時古益莫之知矣埃他日面隲

與季朗書 劉鳳

與兄從事最久情無不相悉然僕多忽忘願請者數復
不記憶去歲淮北遊時繫念况從此浩不可期中夜思
之驚嘆不寐所共厲者文兄才雄倬衍麗非僕所望若
其精理覈詣僕嘗得質疑焉不可一日離舍此遠去此
私所悵快慨惋不自適者也所欲有謁且撫一二夫經
傳周秦間書此詮言之軌然意所向何古之法萌動於
中茫昧未顯非所思存譬水之浸淫因導之流故辭假
之手少復綜緝而已使坎未盈豈能強決意未蓄手能

為之辭乎故肆意而作緣手而奮者善文也規似揣裁
合變赴會融絡構冶連類錯繪者文之牽泥未光也所
以力去陳襲剝削雕鑿必直致颺舉雲駭霆疾而含混
悠遠英嘒靜摯未嘗有意而法度在焉若莊氏綜辭直
無所謂而縱橫數萬言無不燦亮瑩潔秦儀睢澤立談
頃刻竒辨藻辭勁氣逸彩豈思構組撰哉皆自然得之
故敏速倉猝應機蠶涌其斯之貴若其淹緩研吮采摭
按覆則雖肆麗而典峭越以譎尚不足難而况彼弛解

穉淡散亂拙弱若今之所為者何算也且凡與僕力開
新體首闢莽翳何有所藉寄假待而小人大言過不自
愧翻謂穿綴又謂多故實夫不能解而妄詆猶之可也
謂之易而不為抑何罔之甚哉且假能為何不為僕輩
竒恣佚宕而乃守彼區區不足一笑而自謂能將誰欺
哉故實者據事陳義固必及之初非藉此而工彼自不
學而患其與僻則必如彼而後善歟僕往為詩頗咨淳
父未嘗忘彼小人者僕輩誨導之多矣每操戈彎弓何

鄙之甚凡自今冀共閱之勿輕語人也今天下半為王氏學豈王氏才勝凡與僕哉故藉勢位耳凡邇者立致青雲之上海內當復為魏氏學不久矣魏氏學行亦何異僕哉竊所憤悒不平欲一洩曾抱以寄之無窮者不惜重言之夫涉世取位隨時屈伸凡之篤密亦似太甚雖鑒僕疎誕遭尤招嫉是矣事有固然無足深慮機變權畧辨識籌計神鬼隱幽世豈有能出僕輩度內者哉然不能兼得斯亦非慮之所及矣侃侃正議莊色峻嚴

敦重風望不少假徇彼終何所為蝎螫哉得失有分非
人能為煦煦和謹徒使滌惡恣嫚悔耳幸無為鑒之過
苟未然者願有所復無惜

與陸芝秀才書

黃省曾

省曾白紫芝秀才足下近承枉趾間金生用出吾子贈
頌王君仲回之歌推其文章直曰竒於天下夫友朋相
酬固亦貴於吹榜然不宜如此之太甚也夫文之欲竒
於天下也亦難矣前哲姑置勿論國初宋王誠意伯諸

公博洽聰穎倫絕一世然又倥傯兵馬煎熬籌濟卒皆不能大暢以並於古人逮於東里徒持渾厚間淡之體以主張後進而委靡不振之風亦由此而開矣至弘治間有羅公玘者好為竒古而率多怪險餽釘之辭居金陵時每有所造必棲踞於喬樹之巔霞思天想以構脈意或時閉坐一室客有於隙間窺者見其容色灰槁有死人氣皆緩屨以出吾蘇都公少卿與伊乞厥考墓銘銘成告少卿曰吾為此銘瞑去四五度矣今其所傳圭

峰稿者大抵皆樹巔死去之所得也宜其超曠今古而中契昌黎柳州者亦甚鮮矣至有不可讀句而誦者是乃好奇之膏肓也夫羅公好奇終其身而且不得以擅竒名於天下仲回者年始三十其為文僅有數首亦不過談笑觴俎率意為之而已予嘗見之生澀偏苦間似釋氏之言然去俗趨幽是其長也竒且未得而安能遂擅乎天下之竒哉此吾子不思之過也又嘗見人稱頌之作稷契加於汚吏李杜獻於兒曹肺肝沈昏不可救

藥吾子非其流也幸勿效之幸勿效之子若欲知當世能文之士愚雖不能了而所溝接者亦不下數十家各有門戶各有短長待吾暇日悉當抵掌而論省曾再拜

答戴岳書黃省曾

吾姑壻定遠公之卒也數年矣吾子不以省曾為陋而銘書之曠於數年者一旦而誣之於僕僕固非其人也敢不執筆以報吾子之盛心然竊觀今之世自王公而下其淫惡滔天孱細屠販之輩不為少矣其死莫不有

銘其銘莫不稱述其善蓋淫惡滔天孱細屠販之家其
藏篋嘗物而不匱不過少為金帛之捐而稱達官通儒
者乃甘心俯氣贊贊揚揚而不已此無他天下人心同
趨於利而善惡不明故也子試觀於今之人家孰無銘
銘孰無善是何堯舜之世尚有四凶人而茲時何時乃
比屋而可封也大人習之而不以為非君子安之而不
以為陋朝廷縱之而不以為禁所以齷齪之臣逆悖之
子無良之婦皆不妨乎令名而死而春秋不可復作矣

愚嘗痛以為恥誓不為此文以陷於譽墓之譏今子乃欲予以銘子之先人葭莩親誼固不可辭但當實錄吾子先人之行瑕瑜具存勿誇虛欺誕明白而告子也然後為子書之精神面貌庶幾不失其故而吾子先人之心亦不得有愧於泉下矣子其圖之子其圖之開國勲伐併行畧詳來其無忽省曾白

答陳兩湖

羅洪先

僕少有文字癖稍長竊漫為之而蹊徑繆誤肆筆所書

陳言熟語參雜無擇固知絕不類文而血氣日衰又不能淘洗煅煉則已自分棄擲於人必矣凡本以文名家乃時時相向虚心借問如不及者可笑也當其肆筆時亦竊以為文有源委非人所能強為也夫子不云乎辭達而已是辭其後也將以達意意實先之故有蓄意而不盡形之辭者矣未有辭至而意不足者也意不足辭無所於至譬之於水混混有源以出之矣然後舂擊而為濤渟涵而為淵迅駛而為湍縈迴而為瀾衍迤而為

波光浮紋感沫濺狀射隨其所遇各効奇巧以盡變態而
又晶熒澄澈不入滓穢至其經流之連絡又且詰屈宛復
自源達委靡有斷絕使人迫而觀之心神昭曠徘徊而不能
舍夫文不可以強為也何以異於是古之人有能之者必其
中有自得實見此道之流行橫斜曲直小大清濁無所不在
於是觸幾發微或緣彼而歸此或即古以顯今細則取巨
巨則取細常藏於變變藏於常紛紜膠轉不可終窮欲不為
波濤湍瀾之類不可得也

辭盡其變而意始融意融而後辭乃益至雖欲文之無傳亦不可得也不見丹訣禪偈乎辭若鄙俚然而終必傳者其中誠有之也僕則安能為若兄之文脫去往日蹊徑正與僕同而造辭之工則沈穠敷腴句殲字刮使讀者茫然停思而後能悟其措意如送范東明文立論正大無復可議獨欠專欠斷時復野戰雖多淵濶却於經流不免分殺其勢此僕一隅之見非所語於大方不識以為疵蔽否兄往日論遵巖文亦云肥皮厚肉然此

但據其辭云耳眼前人若遵巖於文忒殺有見雖辭甚
豐厚然意之所起皆出入變化不甚拘常而就卑故其
辭皆能究其意之所極而後止不徒為應酬而已惜其
頗費探索非盡骨髓流出視荆川不免讓步然斷斷必
傳無疑也冬至後因病默坐不復對客承遣使多遺又
有重委不敢虛辱輒破戒草此惟教之

與王元美先生

屠長卿

隆髮未燥即知有吳會王元美先生蹉跎三十年犬馬

之齒長矣日手大篇耳榮名夢寐玄圃終屬隔塵言念
哲人臨風悵結隆海以東豎儒耳行能無所比數而好
古有之每讀古人文章則馳神徃哲恨不得與此人同
時時過其故里經其墳墓考其陳迹或故物存古人之
遺或片語出人間之秘輒灑然大喜且披且詫想見其
人神惝恍乎迴翔寥廓之外而馳騫太上之前此何也
又如先朝李夢陽先生近世李攀龍先生業已恨余生
之晚不得奏薄技挾橐鞬以一當兩公徒負高山之懷

抱下泉之戚矣隆賦材故早抗志頗遠不能建標藝壇
而徃徃願北面大雅匪云同志亦其性然矣昔然明傾
心於國僑甯越委身於晏子荀爽御車於李君廷尉結
襪於王生君山歎息於子雲中郎折節於王粲精之所
嚮九原可以執鞭神之所潛虎賁可以隕涕誠以緇衣
之好篤好爵之情靡也嗟乎徃者不可作矣不圖隆乃
得與元美先生同時又吳越相去近也世無先生因羨
異代世有先生何羨異代而乃空懷佳人竟違良晤河

清難俟日月易徂隆支離涉世已見二毛而先生亦垂
老倦遊將圖五嶽恐一朝長畢卒負平生令往者諸公
笑我泉下同天壤者承睫不見慕古何為乎且隆東髮
為諸生厭薄制義中艷古雅讀廣成素問則霄霓欲僂
覽竹書元苞則形骸遂往近探禹穴抽秘金書遙望岱
宗覃思玉簡又鄒魯悅孔孟之仁義濠梁慕莊老之玄
虛之罟誦李斯之古文湘漢懷屈原之詞賦龍門仰太
史之跌宕成都愛相如之麗藻大梁艷鄒枚之浮華淮

南羨八公之鴻烈幽薊喜鄒行之談天青齊驚淳于之
炙穀稷下服田巴之雄辯靈光覩文考之俊才天台高
興公之逸韻諸圖書秘記古文竒字頗嘗泛其洪波收
其鉅麗可謂窮老不厭專精靡他顧生也貧賤僻處東
海青山拄屋寒潮在門波臣竊窺鼃鼃相弔客無大雅
座鮮高言識比夏蟲見同河伯憊然自夸高步濶視謂
於世無雙譬如夜郎王之倔强於南徼扶餘國之自雄
於海中亦可笑矣既而自拔幽囚稍窺玄朗奮然決起

欲出而與海內豪俊論文譚藝而天刑不解人事多違
始困諸生繼束官守玄冬躡雪倉皇涉淮不屈首苦簿
書則折腰趨公府促些咿嘸扶伏婉孌丈夫工為蛾眉
百鍊化為繞指玄鬢條為朝霜雅志都喪俗情轉深吏
事日嬰舊業盡廢終棄大雅寤寐永歎命之不淑安用
生為每望吳會雲亭亭起如車蓋耿耿余懷恨不得即
解印綬從先生散步長洲之苑爾近世七子砢礪有聲
並驅方軌橫行中原苟有遭之人馬辟易數十里矣然

愚竊謂先生最勝譬諸七雄當為秦楚先生富材勁力
雷連颶馳包絡千古吸蕩六合固已赤幟徃哲寧獨白
眉數子乎即如李于鱗雄深竒古非不驚動一世標異
將來詩無論其文信竒矣先王推轂濟南亦至而愚
以為無當先生何也今夫天有揚沙走石則有和風惠
日今夫地有危峰峭壁則有平原曠野今夫江海有濁
浪崩雲則有平波展鏡今夫人物有戈矛叱咤則有俎
豆晏笑斯物之固然也藉使天一於揚沙走石地一於

危峰峭壁江海一於濁浪崩雲人物一於戈矛叱咤好
竒不太過乎將習見者厭矣文章大觀竒正離合瑰麗
爾雅險壯溫夷何所不有嘗試取先民鴻製大作讀之
書如盤庚禮如檀弓周禮如考工記亦云竒古近險矣
而不過偶一為之其平曠瑩徹揭日月而臨大道者固
多他如穆天子傳左國莊騷秦碑呂覽諸篇雖云魁壘
多竒而其平易者亦徃徃不少惟揚子雲好竒言言艱
棘後世而下論者為何平生辛苦蟲魚自况出竒間道

終屬偏師固未聞獨模後人盡掩前哲也先生嘗謂李
王孫竒過則凡老過則穉嗟嗟獨王孫哉于鱗之竒驅
騁周漢固非子雲敢望然言言若此終墮好竒譬如終
南懸崖竒矣然使終日而在目則厭不如日月之光也
江上裂石竒矣然使終日而在耳則厭不如雲檣之奏
也信如于鱗標異凌厲千古吞掩前後則六籍之粹白
漢詔誥之溫厚賈長沙之浩蕩司馬子長之疏朗長卿
之詞藻王子淵之才俊六朝之語麗不盡廢乎即天又

奚以稊風惠日為也故愚竊不自量謂于鱗雖竒而無當先生先生何所不有也有于鱗有獻吉又兼有徃哲而又自有元美廣大變化斯其所以極玄也讀菴苑卮言辯博哉如涉太湖雲夢焉讀弇州集魁瑰鉅麗和暢雄俊哉如泛大海焉又如觀玄造焉其為文包羅左國吐納莊騷出入楊馬鞭筆褒雄其為詩鍊格漢魏借材六朝同工沈宋登壇李杜誠天府之高華人文之鴻鉅作者之極盛矣觀止矣然小子隆又竊有疑焉雋永之

中不嫌雜俎閎麗之極間出麓豪又撰著太多篇章太
富宇宙羣品題咏靡遺古今萬狀蒐羅畧盡無乃傷於
雜乎豈玄造之中本無所不有耶竊意無所不有亦必
有所無矣遊目羣玉之巔失足閎風之上精眩魂搖迷
不知所適何時摳衣登堂面受大教也隆自知小技不
合大方區區之心欲自進門下亦無鹽之所以見齊王
也然先生廣心遠識延攬四方豪俊惟恐失之豈可使
門下不知有東海屠生哉吾鄉沈嘉則先生聲律雄大

與龍伯爭長東海鄙數千年無大雅其他瑣尾者又不
足道賴嘉則出一浣之耳先生以為何如友人沈懋學
者其人英雄善談執談兵談堪輿家言體貌不甚偉能
運鐵矛手馘百夫疇昔嘗散千金走九邊觀戍壘結交
豪傑將帥藻思超逸落筆萬言雖不甚深古而雄快可
喜又忼慨忠義重然諾篤交遊多情稱丈夫哉先生不
可不識其人馮夢禎者素心人好古博雅尤深玄理每
遭事意氣有之不則瞑目趺坐竟日若枯槁觀其人亦

自不凡京師今多奇士此兩生者尤與隆交驩敬而愛之敢以聞於門下先生高才為尊官下邑小吏不當輒以尺一通又不當輒參口狂言罪僂是愬然隆私度扶伏州郡長吏車下至屏息不敢出聲而揚眉先生之前斯其故可知也先生豈以高才尊官傲天下士者哉謹以所為鄙言請教門下

明文海卷一百五十四

欽定四庫全書

集部

明文海卷一百五十五

六

詳校官編修 臣錢樾

主事銜 臣徐以坤覆勘

總校官庶吉士 臣倉聖脉

校對官助教 臣蔡鎮

謄錄監生 臣林李

欽定四庫全書

明文海卷一百五十五

餘姚黃宗義編

書九

論文

遺伯兄元美

王世懋

世懋以丙子歲六月受四部稿於鄆邸奔走終歲卒業舟車間未遑窺作者之奧也在昔士龍獻記於平原君子無譏焉竊不自揆略據所見倘汙我者以為阿好則

有斯集在夫角力者力有大小角藝者藝有精疎所以
皦然易辨者何在旅勝旅負耳書畫稍涉印證便自難
於執力然有跡可尋具眼自見至乃文章之業寸心千
古雕蟲自工刻鵞忘鴈匠鑄既自殊途評騭又豈恒論
雌雄今古於斯實難若區區之見猶謂匪然政以世無
真才才乏通方即以吾兄言之弇州一集足藏數賢即
忌才者可謂文章小道不可謂才遜古人由斯而言寧
無定價蓋謬悠之談至乎人才極矣以是古非今之口

值朝賢暮佞之身幸則藏拙於筆端不幸則毀成於吻
角所以我明三百年來堂堂大業而必謂聖庭絕從哲
廡隔塵遠則董相之賢不信於歆固近則文成之詣尚
卑於羅李良可歎也詩道拓基於北地極深於濟南然
而採蓄之途尚狹游矯之神未充兼此二家登乎彼岸
古惟陳思子美今則吾兄庶幾吾兄境雖神詣然亦學
以年幼白雲之什雖經刪改未離矜莊逮乎讞獄三輔
建節青土字字快心言言破的性靈效矣變化見矣擊

節賞勝每恨古人無此快句然謂稍遜古十九首意者亦坐斯媿居憂以後縱心觸象取材愈博演教彌神或鬼篆蛇文冥搜六合之外或牛溲馬勃近取咫尺之間離觀則邈若無關湊泊則天然一色大都字險者韻必妥韻奇者聲必調天壤之間若為預設此真藝林之絕技律家之玄造也甚或直指故陳纖辭間作雖淮陰用兵多多益善瞿曇拈指頭頭是道然弟臆陳則謂周行所示末流宜慎何者恐比丘無飯鉢之能效羅什而有

室也所以鄖襄諸篇特寡游戲簡善詭以示娛弘大雅而垂訓意在茲乎騷賦同源長短各擅作者無幾成章斯達即使美不逮於古人長足掩乎末世况文質麗爾彬彬具足者哉樂府一出必使于鱗匿響明卿竄影宏篇奧句故是苦心極力之言齊梁小調當與六言並觀前無敵手世眼不解服膺青蓮異時分道並馳未可知也文章之妙尤不易言自宋迄明可謂無文而吾兄獨收二李之都長上接西京之宗旨紀事持論各臻妙境

出沒變幻殊非一途所謂大能使之小小能使之大虛能使之實實能使之虛遠能使之近近能使之遠斷能使之續續能使之斷庖丁解牛輪扁斲輪莊生喻道吾以論文唯諸小論稍質於歐蘓而微弱於韓柳尚未當家故毋足傷其大也弟與胡郎元瑞論古今文人互有雌黃至於吾兄無可瑕摘妄謂具美之中稍露巧骨似於古人滔滔莽莽渾厚質直之意少殊然作文至此正亦何須莽直胡郎笑而不答元瑞又為弟言古人文章

大家無闕博洽至專門肉譜尚多謫漏而君家中丞於博洽中特擅精覈此在古人尤以為難弟頗賞其能言抑亦可謂篤論矣昔玄德短氣於伯符衛媪揮涕於逸少弟豈敢謂來者之無人終自信真才之難再耳興集神來不知所裁倘獲首肯毋以示人如其未安請俟來諭

與蔡白石太守論文書

茅坤

伏念僕與兄同起湖中前後中明天子甲乙之科當是

時僕忘其駑劣而推附於兄兄亦憐其同聲而好為揚
於縉紳大夫之間星附於月丘附於壘遂得並聲而馳
然嘗誦兄之詩讀兄之文章竊疑官不稱其才位不當
其識兄亦顧僕時相笑咤纍歎不已也僕今且操縣印
綬於江海之間者十年於此矣漁石入為吏部尚書大
鶴為文選郎偶皆故知始得解去縣印綬廁名郎署兄
或喜其稍進而亦未必不憐其晚也然竟不能一日安
於朝廷之上隨被指疴而去其間事機固遭時難然其

所陰構力擠則實起忌於同輩絀怨於顯游彼其創謀不
過欲搯人之吭而去其食也而其所相與合為萋菲遂
至有耳目心思所不逮者悲乎悲乎僕常讀古蜀道難
詞以為風人之旨喑嗚涕洟故亡實至是今何意驅轂
結軫游其間哉雖然僕何尤也僕自罪譴以來以為進
不得附當世名公鉅人顯揚功名退亦當如園丘巖壑
之吟自勒一家以遺於世即欲亡去匿身五湖烟霧之
間以從所好也然或謂今且罪遣不得遽強而之者故

姑浮湛混濁沼博中山之間然其當晝而思當寢而夢已逃人世久矣僕嘗念春秋以來其賢人君子間遭廢斥未嘗不即其窮愁自著文采以表見於後何者恥心有所知與腐草同沒也然技不能兩有所精而學不能兩有所逮何者傳不云乎倕工於為車而言天下之善射者必曰羿也奚仲工於為車而言天下之善御者必曰造父也蓋萬物之情各有其至而人以聰明智慧操且習於其間亦各有所近必專一以致其至而後得以

偏有所擅而成其名故世皆隨孔氏以非達巷而僕獨
謂孔氏之言者聖學也今人未能學聖人之道而輕議
達巷者皆惑也屈宋之於賦李陵蘇武之於五言馬遷
劉向之於文章傳記皆各擅其長以絕藝後代然竟不
能相兼者非不欲也力不足也故李杜詩聖而韓歐文
匠其間不自量力揚蹠蹠蹠而進者獨魏晉曹劉二陸
及唐元白柳宗元之徒稍稍侈心焉然亦疲矣使宗元
獨以其文與韓昌黎爭雄當未辨孰劉孰項而曹劉獨

縱其詩聲於武陵之間又未必降為黃初之音也故曰
人各有能有不能僕才乏思澀於兩者俱無能者也然
間嘗從兄學為詩每見兄言笑出金石噴吐傾珠璣數
年以來大者王孟小者劉韋矣而獨不能睥睨一二其
中者不出兄之唾遺其背而馳者尾瑣猥陋矣獨私扣
文章之旨稍得其堂戶扁鑰而入而自罪黜以來恐一旦
露零於茂草之中誰為弔其衷而憫其知以是益發憤
為文辭而上採漢馬遷相如劉向班固及唐韓愈柳宗

元宋歐陽修曾鞏蘇氏兄弟與同時附離而起所謂諸家之旨而揣摩之大畧琴瑟枳欸調各不同而其中律一也律者即僕曩所謂萬物之情各有其至者也近代以來學士大夫之操觚為文章無慮十百家其以雲吻霧喻虎嚙鷲攫之材揚聲藝林者亦層見踵出然於其所謂萬物之情各有其至者或在置而未及也近獨從荆川唐司諫上下其論稍稍與僕意相合僕少喜為文每謂當跌宕激射似司馬子長字而比之句而億之苟

一字一句不中其纍黍之度即慘惻悲悽也唐以後若薄不足為者獨怪荆川疾呼曰唐之韓猶漢之馬遷宋之歐曾二蘇猶唐之韓子不得致其至而何輕議為也僕聞而疑之疑而不得又蓄之於心而徐求之今且三年矣近廼取百家之文之深者按覆之卧且吟而餐且噎焉然後徐得其所謂萬物之情自各有其至而因悟曩者所謂司馬子長者眉也髮也而唐司諫及僕所自持始兩相印而無復同異今僕不暇博喻姑取司馬子

長之大者論之今人讀游俠傳即欲輕生讀屈原賈誼傳即欲流涕讀莊周魯仲連傳即欲遺世讀李廣傳即欲力鬪讀石建傳即欲俯躬讀信陵平原君傳即欲好士若此者何哉蓋各得其物之情而肆於心故也而固非區區句字之激射者昔人常謂善詩者畫善畫者詩僕謂其於文也亦然今夫天地之間山川之所以寥廓日月之所以升沉神鬼之所以幽眇草木之所以蕃翳魑魅之所以悲嘯九州之所以聲名文物四裔之所以

雕題鑿齒以及聖帝明王忠賢孝子羈臣寡婦讒夫佞
倖幽人處士釋友仙子之異其行禮樂律歷兵革封禪
天官卜筮農書稗史之異其術宴歌遊覽行旅蒐狩問
釋譏嘲咏物賦情弔古傷今成敗得失之異其感彼皆
各有其至而非借耳傭目所可紊亂增葺於其間者學
者各得其至合之於大道而迎之於中出而肆焉則物
無逆於其心心無不解於其物而譬釋氏之說佛法種
種色色逾玄逾化矣嗚呼盛矣此庖羲氏畫卦以來相

傳之秘所謂其旨遠其辭文其言曲而中固非專一以致其至者不可與言也近與潯陽書亦論文大較與告兄者互暢其旨而僕亦未敢遽取然諾於兄但操金而求酒不敢不問價於市也并附與潯陽書及所著文數篇幸兄憫而裁教之荷甚荷甚

明文海卷一百五十五